

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-659/12  
Sarajevo, 16.5.2012. godine

**Z A P I S N I K**  
**7. VANREDNE SJEDNICE DOMA NARODA PARLAMENTA**  
**FEDERACIJE BIH, održane 16. maja 2012. godine**

Sjednica je počela u 15.40.

Sjednici je predsjedavala Karolina Pavlović, predsjedavajuća Doma naroda Parlamenta Federacije BiH.

Na početku sjednice predsjedavajuća je pozdravila delegate, predsjednika Federacije BiH Živka Budimira, potpredsjednika Federacije BiH Mirsada Kebu, ministre u Vladi Federacije, predstavnike nevladinih organizacija, predstavnike akreditiranih medijskih kuća koji prate rad sjednice i goste.

Izostanak sa sjednice su opravdali: Zora Dujmović, Mladen Lonić, Branislav Crnogorac, Darko Horvat i Slaviša Mihajlović.

Na osnovu evidencije Stručne službe, predsjedavajuća je konstatovala da sjednici prisustvuju 43 delegata, što čini većinu, te Dom naroda može raditi i punovažno odlučivati.

Predsjedavajuća je obavijestila delegate da je predsjednik Federacije BiH Živko Budimir dostavio Parlamentu Federacije Prijedlog Deklaracije o neprihvatanju ukidanja supervizije za Brčko Distrikt Bosne i Hercegovine, koja je predložena kao tačka dnevnog reda ove sjednice.

Budući da nije bilo prijedloga za izmjenu i dopunu dnevnog reda, predsjedavajuća je, na osnovu rezultata glasanja, konstatovala da je Dom naroda Parlamenta Federacije BiH, sa 35 glasova za, uz šest uzdržanih glasova i uz jedan glas protiv, usvojio sljedeći:

## DNEVNI RED

### **Prijedlog Deklaracije o neprihvatanju ukidanja supervizije za Brčko Distrikt Bosne i Hercegovine.**

Prijedlog Deklaracije dostavio je predsjednik Federacije BiH.

Predstavnički dom je na 6. vanrednoj sjednici od 16. maja 2012. godine donio Deklaraciju o neprihvatanju ukidanja supervizije za Brčko Distrikt Bosne i Hercegovine. Tom prilikom Predstavnički dom je usvojio Zaključak.

Prijedlog Deklaracije obrazložio je Živko Budimir, predsjednik Federacije BiH, koji je obavijestio delegate da je Predstavnički dom donio Deklaraciju sa određenim preinakama u odnosu na prvobitni tekst Deklaracije, te izjavio da se slaže sa tekstom Deklaracije koji je donio Predstavnički dom.

U raspravi je učestvovala Mira Ljubijankić, predsjednica Kluba delegata srpskog naroda, koja je, ispred Kluba, predložila da se u 2. tački Deklaracije briše riječ "mora" jer nije prikladno da se ovom riječju izvrši obraćanje Skupštini, tj. da je dovoljno da piše tekst kojim se: "zahtijeva i traži od Narodne skupštine Republike Srpske da poništi svoju odluku o neprihvatanju Konačne odluke Arbitražnog suda i donese odluku ili zaključak o prihvatanju Konačne odluke Arbitražnog tribunala o proglašenju Brčko Distrikta Bosne i Hercegovine". Izjavila je da Klub delegata srpskog naroda podržava Deklaraciju.

Predsjednik Federacije je izjavio da Narodna skupština Republike Srpske mora prihvatiti Konačnu odluku Arbitražnog suda.

U raspravi su učestvovali i Amir Zukić, predsjednik Kluba delegata bošnjačkog naroda, i Elvira Abdić-Jelenović.

Nakon rasprave, predsjednik Federacije je pročitao Deklaraciju.

Potom je predsjedavajuća Doma naroda pozvala delegate da se izjasne o Deklaraciji.

Na osnovu rezultata glasanja, predsjedavajuća je konstatovala da je Dom naroda Parlamenta Federacije BiH, sa 38 glasova za, uz dva uzdržana glasa i uz osam glasova protiv, donio Deklaraciju o neprihvatanju ukidanja supervizije za Brčko Distrikt Bosne i Hercegovine.

Budući da je izražena sumnja u rezultate glasanja, pristupilo se poimeničnom glasanju koje je obavio Izmir Hadžić, sekretar Doma naroda Parlamenta Federacije BiH.

Na osnovu rezultata poimeničnog glasanja, predsjedavajuća je konstatovala da je Dom naroda Parlamenta Federacije BiH, sa 38 glasova za, uz tri uzdržana glasa i uz sedam glasova protiv, donio Deklaraciju o neprihvatanju ukidanja supervizije za Brčko Distrikt Bosne i Hercegovine.

Budući da je Klub delegata bošnjačkog naroda predložio Zaključak, predsjedavajuća ga je stavila na glasanje i konstatovala da je Dom naroda Parlamenta Federacije BiH, sa 35 glasova za, uz tri uzdržana glasa i uz osam glasova protiv, usvojio sljedeći:

### **ZAKLJUČAK**

Zadužuju se predsjednik i potpredsjednici Federacije BiH da traže sastanak sa Upravnim odborom Vijeća za implementaciju mira u Bosni i Hercegovini, Visokim predstavnikom u Bosni i Hercegovini i supervizorom za Brčko Distrikt i informiraju ih o stavovima Doma naroda sadržanim u Deklaraciji.

Sjednica je završena u 16.30.

\* \* \*

Deklaracija o neprihvatanju ukidanja supervizije za Brčko Distrikt Bosne i Hercegovine čini sastavni dio Zapisnika.

\* \* \*

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVALA

Karolina Pavlović, prof.